

80 bakal sertai Festival Luncur Ombak Cherating 2022

Oleh [Asrol Awang](#) - Januari 27, 2022 @ 8:31pm
bhsukan@bh.com.my



KUANTAN: Seramai 80 peserta dari seluruh negara mengesahkan penyertaan pada Festival Luncur Ombak Cherating 2022 anjuran Kelab Luncur Ombak Cherating (KLOC) di Pantai Cherating, di sini, pada 4 hingga 6 Februari ini.

Naib Presiden KLOC, Muhammad Zaim Abdul Hayu berkata festival itu yang turut disertai 20 peluncur dari Sabah menawarkan hadiah keseluruhan kepada pemenang berjumlah RM10,000.

Katanya, sebanyak enam kategori dipertandingkan pada festival berkenaan termasuk papan luncur pendek lelaki dan wanita, papan luncur panjang lelaki wanita, masing-masing berumur 17 tahun ke atas.

"Kategori lain ialah papan luncur pendek bawah 16 tahun dan luncur badan," katanya.

Festival Luncur Ombak Cherating 2022 dianjurkan KLOC dengan kerjasama Tourism Pahang, Persatuan Luncur Ombak Malaysia (PLOM) dan Ripcurl.

Muhammad Zaim berkata festival itu turut menyaksikan penyertaan daripada atlet kebangsaan.

Beliau menjemput orang ramai, khususnya peminat luncur ombak untuk hadir menyaksikan festival yang kali pertama dianjurkan KLOC.

"Mereka yang berminat untuk mencuba sukan luncur ombak juga boleh berbuat demikian sepanjang festival berlangsung," katanya.